

Na 88 aña di su natalicio:

JUAN ENRIQUE IRAUSQUIN, UN GRAN VISIONARIO DI FUTURO DI ARUBA

ORANJESTAD (AAN) - Ayera tabata un fecha importante pa Aruba, cual Archivo Historico a recorda. E ilustre Arubiano Juan Enrique Irausquin (q.e.p.d), a nace 88 aña pasa.

Archivo Historico a proporcionar DIARIO un resumen di e Biografia di tan ilustre Ciudadano di Aruba.

Juan Enrique Irausquin a nace na Aruba, dia 3 di December di 1904. Despues di a termina su estudionan di lagere school na Aruba, el a bay Curacao na unda durante varios aña el a sigui diferente curso den accounting, moneda y movimiento bancario na un instituto Americano.

Na e edad hoben di 14 aña, el a drenta servicio di Hollandse Bank como office-boy, y den un tempo relativamente cortico a yega na e cargo di Procuratiehouder.

Impulsa pa un espiritu di superacion, Juan Enrique Irausquin, a tuma retiro for di Hollandse Bank na 1929, pa drenta servicio di e firma John G.Eman, cual durante algun tempo tabata haci negociacion bancario. El a bira un di e fundadornan di John E.Eman Bank.

Na aña 1936 e firma John



G.Eman den cooperacion cu Maduro & Curiels Bank N.V., a dicidi di funda e prome banco na Aruba, Aruba Bank N.V. Juancho, manera popularmente señor Irausquin tabata conoci, a bira Director di e banco aki, puesto cu el a keda ocupa te na 1951, ora cu el a laga dicho cargo pa dedica su mes na politica.

Señor Irausquin tabata activo riba hopi tereno. E tabata Presidente di Camara di Comercio, di e Comision di Turismo, miembro di hopi comision economico, co-fundador di Rotary Club y Home Building Foundation na Aruba, actualmente yama Volkskrediet Bank.

Na aña 1947 el a bira miembro di Staten siendo reelegi como tal den tur e eleccionnan cu a tuma lugar posteriormente.

Varios biaha el a worde nombra Presidente di Staten como reconocimiento pa su capacidad parlamentario. Desde aña 1948 el a participa na tur conferencia importante en conexion cu autonomia pa Antiyas y reconstruccion di Reino Hulandes.

E tabata forma parti di e Ronde Tafel Conferentie y e asina yama Kleine Commissie.

Na aña 1949 Juan Enrique Irausquin a funda Partido Patriotico Arubano (PPA).

Ya un aña despues el a gana dos asiento den eleccion pa Staten. Na aña 1951, tempo cu e prome eleccion di Eilandsraad a tuma lugar, el a ser elegi, kedando miembro di e organismo aki durante varios aña y desplegando un oposicion cu jamas a worde iguala den historia di Aruba.

Resultado di esaki tabata 15 asiento den Eilandsraad di Aruba.

Dia prome di April 1956 el a ingresa den Consejo di Ministro como Ministro di Finanzas y Fomento, cargo importante cu el a keda ocupa te na su morto riba dia 20 di Juni di 1962 na Hospital Santa Elizabeth na Curacao, pa 7.30 di anochi.

Como reconocimiento na su hopi m'eritonan riba tereno politico, economico y social, su Majestad Reina Juliana a nombre Officier den Orde van Oranje Nassau.

Juan Enrique Irausquin ta worde reconoci como un gran luchador, cu tabata tin parti activo den e desaroyo economico di Antiyas Hulandes y en especial e desaroyo economico di Aruba.

Ariba e tereno aki el a laga su stempel indisutible. Amigonan tanto paden como pafor di e partido a deposita

confianza den dje, na momento cu enemigonan politico tabata haci bofon di su ideanan.

Den e luz aki por menciona e planta di awa y electricidad, WEB, cual gracias na su empeño incansable a worde expande.

Door di e awa y electricidad cu nos planta di Balashi por a ofrece, tabata posible pa atrae na Aruba e planta quimico "Antilles Chemical Company" y desaroya un sector hotelero.

Promotor di un era naobo di nos industria di turismo, pa su insistencia hotelnan a worde traha den e area di beachnan pa asina inicia un segundo pilar di economia pa Aruba. Tur esaki den un tempo cu masha hopi habitante tabata tin duda si turismo tabata un alternativa pa e isla.

Juancho Irausquin a mantene su criterio cu Aruba tabata tin mester di un segundo pilar economico pa por salba e economia di Aruba den caso cu e industria di LAGO lo mester a cera su portanan.

Na aña 1984/85 a yega loko den su periodo Sr. Juancho Irausquin a visualiza, y ora cu LAGO a cera su portanan ta hustamente e industria di Turismo di Juancho a salba nos isla Aruba, comprobando su vision.

Distancianan largo el a sa di haci cortico, habriendo asina e posibilidad pa hubentud di Aruba por goza di estudionan den exterior. Riba tereno social el a introduci pensioen di vejez, viudez y huerfano.

Juancho Irausquin tabata casa cu Maria Waizberg.

Su number, labor, actitud, caracter, y sentimentonan pa e problemanan di e ser humano den comunidad, y mucho mas, a hibe den tur skina di Aruba. E tabata un homber recto, di caracter serio, cu awendia te ainda ta dificil pa haya otro pilar mescos cune. Ta pesey ariba su estatua tin e palabranan Servidor di Pueblo.